

光緒江西通志

江西通志卷一百六十三

列傳三十 饒州府四

國朝

范文程字現斗祖貫樂平人九世祖景申戍遼左六世
生鏞字平甫明正德進士官甯夏巡撫晉兵部尙書鏞
生澄澄生楠楠生文程幼補博士弟子員負文武才從
太祖皇帝龍興參贊機務順治元年

聖朝定鼎燕京以翊戴功晉內祕書院大學士掌院事旋上章
歸政構園亭於郊外日讀書其中賦詩彈碁以自娛勲
名壽考爲世罕及子承謨順治壬辰進士歷官浙閩總

督耿精忠反抗節不屈死之諡忠貞

人物志程崛起遼左勲業

隆盛援其祖貫載入江西此湖志之舊例也今依劉秉忠例亦應從剛以相仍已久姑列之

史彪古字煥章鄱陽人順治進士入翰林改給事中前

後居諫垣十年性狷直後擢京卿歸里卒

安志

王言綸字絲如址四世孫順治鄉舉以會試副榜例選
推官不就改豐城教諭遷廣信教授性好書藏皮甲一
邑至老嗜學彌篤論纂經史迄不自休嘗分修府志是
非無所遷就

府志

黃有章字閻如鄱陽人順治初歲貢性渾樸與物無競
幼女受蕭氏聘蕭氏子被掠無音問待之二十年蕭氏
子歸有章撫如己子甲寅避兵儒塘一日沐浴逝年八

十有七

府志

周邦楨字克生鄱陽人順治恩貢入試上等

賜宴太和殿授臨淮知縣明制臨淮分勑戶陵戶民戶三等勑

陵田沃而賦輕民戶田瘠而賦重邦楨力請上官疏改
一例臨淮人德之相與歌詠性廉一介不妄取官三年

乞歸囊橐蕭然

府志

胡之珩字集英餘千人居仁八世孫築室藏山之麓顏
其堂曰希敬精於易兼通河洛理數晚充歲貢就聘主
東山書院所著有希敬堂八箴東山學規及詩經養正
藏於家

白志

汪心一字爾清浮梁人諸生少倜儻有遠志書劍皆精
妙鼎革後隱居源溪醫方內典並有神契

府志

史白字堅又鄱陽人乘古五子明亡母姜殉節白絕意
進取築室城西青湖經年不出戶鄉鄰或有以是非質
者白必徑直言之人多服其古道無少長皆呼先生耿

精忠吳三桂叛白聞其檄罵曰此逆豎也必速滅事定
人尤服其先見年七十七卒子大壯幼習制舉弧矢技
擊皆精之俄悉棄去潛心理學坐臥一小樓寒暑不輟
三年學大進往師毛惕庵於匡山歸教授里中卒

府志

王閔道字趙如鄱陽人歲貢生方赴廷試念親老亟歸
侍養父疾危篤呼天請以身代已而果瘳處兄弟友愛
無間子傳自有傳

崇祀錄

洪國屏字耕石餘干人歲貢生歷官訓導教諭擢中部
知縣有惠政尋以老病乞休卒於邸貧乏至無以爲殯

府志

彭允升安仁人諸生康熙乙卯賊踞縣城允升練鄉兵
禦賊被執賊使招降所部不從遂遇害鄉人義之塑像

祀里中白兔寺

府志

吳鎬字西澗安仁人幼喪父與叔同居事之猶父叔有二子鎬友愛罔間後叔子忽求分析固以請鎬不得已取貲產三分之一餘悉以歸叔子族黨高其義讓尤工詩文所著曰西澗集

府志

沙坤瑞餘干人性至孝年十六喪父無貲典身以殮母目失明舐以舌得愈母年八十餘衰病不能起朝夕奉侍無怠母沒慮墓三年致馴虎伏蟒之異

安志 白志 舊案安志又

載餘干志 佩邵陽 黃天壽俱以孝稱

王好善萬年人性孝友樂施與順治甲午大旱饑倒廩出粟以賑貧之鄰有賣妻鬻子者皆爲收贖屢與鄉飲

年八十三卒

府志

楊鼎臣樂平人父明由爲盜所執索多金以贖罄家不能得鼎臣毅然以身爲質易父還後竟爲盜所殺知縣

高脫凡旌其門

府志

李日新字三銘樂平人諸生孝行甚篤九歲侍母病親

湯藥如成人母亡廬墓三年卒祀孝子祠

府志

許琮字宗玉樂平人孝友誠懇讀書漣漪堂不樂仕進

與鄱陽陳會同邑王綱講書辨論無虛日暮年學易日

治一章爲常課

府志

張時爲字景明餘干人幼孤育於祖母既長傭耕以養好學不輟明末舉貢慨然曰仕以爲親也而養不逮栖栖何爲遂棄去性方嚴以道自任讀禮至頭容直目容端憬然心省自是一從事於禮未嘗少怠燕居畫紙爲

格以驗存心日書敬怠歲十二紙名進修日錄自題讀書處曰內續欲內力相續不間斷也及耄復悟曰專求諸內有徑約之失乃取主一無適之旨密求之無事則存養此心有事則念不他及又隨所得作劄記曰六一寤言謂前此夢今始覺也卒祀鄉賢

府志

李莊字元肅樂平人諸生以孝友廉潔推重於鄉巾歲後不入城市者四十年縣官慕其高致見之不可每式

廬加敬焉

府志

黃景文字仲純浮梁人明諸生尋棄去結廬西郊潛心經史亂甫定族人有逋賦者隸竄景文名召至縣將予杖景文默不置辨縣官異其氣度或告曰是曾爲秀才景文曰民不爲秀才久矣縣官異而遣之

府志

蔡之萱字子牧鄱陽人康熙鄉舉時叅將程鳳叛將軍額楚復饒州城招之萱住饒自移兵將取廣信額楚去賊復熾之萱母爲賊所掠力救得釋而之萱爲賊縛去舁以入問之萱爲別母詩寄歸慘惻不可聞旣又啗以僞職不屈與閩督范承謨同遇害并樓門外

府志

徐強字仁剛餘干人副使光璧子有勇略隨父征閩父歿於陣強力戰奪父屍還耿精忠圍溫州將內訌強在圍中爲軍民論大義率眾擊賊破寨十九斬首四千餘進復海澄禽僞將十有一人俘獲無算錄功加一等復加十九等授左都督仍紀餘功五次由守備累遷山東臨清營副將戢兵靖盜四境晏然年老乞歸軍民戴香盆餞送歷二十里不休子德一工書畫以功臣後入監

肄業

府志
縣志

操秉忠字汝端鄱陽人武生康熙閒三藩叛秉忠年十八集義勇禦寇嘗從軍克徽饒上功最累官至遊擊府志朱壽命餘千人康熙十四年邑方有兵事與母李相失日夜悲泣夢神語母隸正藍旗下痛哭走京師行乞市中蹤迹久之得母所在如夢語艱於貲不能贖日謁於門乞哀膝盡瘡學士邵遠平義而代贖之卒奉其母歸邵長蘅爲之傳知縣管掄有詩紀其事府志

吳湯生安仁人性穎異通經史大義輒以忠孝自許年十三母趙病刲肉方寸佐藥服之愈康熙十四年江霧山賊掠安仁湯生與兄洪生奉母先出父士驢遇賊被縛洪生聞變往請代賊併縛之湯生馳至乞代父兄命

哭聲振天賊眾相顧錯愕至有泣下者乃釋其父兄縛
湯生湯生從容曰以父母之身為父母死吾無憾矣且
泣且罵遂遇害時年十七

府志

汪耳黃

縣志作土
鼎字耳黃

餘干人康熙中寇變父文運被掠日

夜哀泣請代不許夜涉深淵直過之賊驚曰此孝子也
乃舍之遂負父避去鉛山蔣士銓爲作孝子詩

府志

張景謙字廣益德興人康熙進士初由舉人取教習越
三年例官知縣既登第仍歸教習本班官江南太和知
縣權潁州在任爲四箴以自警有勿欺一念勿輕一言
勿忽一事勿逞一時諸目政成而歸父老依依不忍其
去

府志

王傳字紹新鄱陽人康熙進士改庶吉士累官國子祭

酒三爲會試同考俱稱得士出督山東學政嘗曰學臣
清心寡欲不足異所難者衡才不爽尺寸耳人服其言
再典試山東時大旱榜發甘霖立沛人稱爲霖雨榜所
錄多名宿又號先生榜復

命後

御書講幄清班賜之年六十五卒於官

詔賜祭葬

謝志

左有言字次立鄱陽人康熙進士河南汲縣知縣明敏
果斷尤精衡鑒縣人景考祥竇容恂皆所識拔爲名進
士

聖祖西巡

召見行宮賦詩稱

旨記名擢用以疾卒官士民立左侯祠府志

陳冕字首人鄱陽人初由舉人官南康教諭康熙中成進士選山東館陶知縣邑西河寨十餘邨爲漳水所淹九載不治冕至出俸金開濬越兩月水歸故道民勒石紀其德名陳公河母老乞歸府志

王邁字日新德興人宋儒過裔康熙進士改庶吉士散館授檢討協修一統志

上賜緞服圖書松花硯以旌其文學被

命旨

上書房爲和碩顯親王伴讀充會試同考官所取皆知名士卒祀鄉賢府志

王允洪字禹範傳子康熙鄉舉廣東潮陽知縣潮陽瀕

海民業漁恆苦沈溺海賊標掠出沒無時允洪至置艇
各汊定漁人出海常期救生防患區畫最密擢刑部主
事尋出知雲南姚州姚僻處萬山輸賦艱輓運允洪陳
之上官折色徵收著於令甲民安之再擢刑部郎中弟
允澄原名溥康熙鄉舉選正定知縣有將弁激營兵爲
變允澄單騎往撫皆羅拜散去行取戶部主事出爲思
恩府理苗同知尋權桂林知府勦撫猺獠擴桑江苗疆
八百里擢太平知府刑部侍郎馬爾泰薦允澄堪御史
會以憂歸卒季弟允深雍正鄉舉歷官山東惠民陽信
諸縣嘗奉檄疏徒駭馬頰二河徹晝夜臨險不避三旬

工成擢知州

府志
縣志

程四達字心如鄱陽人幼好學及長究心性命之旨晚

居龍嶺著述自娛嘗立敦本勸輸備荒簡訟閑邪五約以誠子姓有誤取竹一竿者令送歸謝罪歲歉多盜稔四達高節相戒不入其鄉既卒同里王順乾題其墓曰隱德君子順乾與曹奏績陳會暨四達皆藏名避世稱四先生知府翟象陸欲見之卒不得府志

鄭珂字宗幹浮梁人貢生家世儒者自少志學比長持躬愈謹常遊滄溪閣先儒朱宏著述益潛心理學教授於古華巖從遊日眾學者稱古巖先生府志

蔡薰字廷芝安仁人康熙貢生官東鄉訓導勤於課士祿入粗給衣食餘以資貧士膏火士樂從之尤精甘石

家言測驗甚精

府志
縣志

江德字恆修鄱陽人母疾禱天願以身代泊卒廬於墓

所虎衛其旁免繞於側知府翟象陸感其孝給餼贍之

府志

史詢字次謀鄱陽人拔貢生授教職臨川李紱與訂文

字交好學至老不倦子宏譽雍正鄉舉

縣志

吳璘都字九儀安仁人拔貢生少孤躬耕養母行吟不輟學書苦無楮以箸畫石習久遂工楷法同時浮梁吳從至德興王邁鄱陽計曰賢史詢皆相推重既以親老不調選母年九十餘色養終身性嚴潔不輕訾笑冬夏一布袍瓶無餘粟異如也

縣志

戴如壽字介眉樂平人康熙間土寇竊發掠如壽從弟去舉家憂泣如壽挺身赴賊營請易弟籌金自贖賊許之如壽屬弟速徙我自能脫弟歸贖金不至賊知給己

將殺之如壽賊守卒醉臥脫械夜遁卒獲無恙

府志

朱士遠字有明樂平人年十五隨父出樵父爲虎所攫

士遠持挺疾擊奪父屍還母病劇刲股以進得愈

府志

胡士懿字美仲樂平人歲貢生官新昌訓導名節自勵所造多賢俊部使者徵通糧急士民皇然士懿曲爲調護賦舉而民不累巡撫廉知其賢將上疏薦士懿力辭

歸

府志

胡景定字子靜樂平人雍正進士行誼篤實用薦授知

縣不就以教授終老

府志

金起濤字飛客浮梁人歲貢生漁獵百家折中正學鄉

里宗之

府志

王璽字玉成都陽人二歲父出其母繼母張生玉父歿

璽事繼母撫弱弟孝友無閒比玉長請析產璽恣弟意
一無所校數年玉喪其資復請合爨許之數年又請析
璽給田宅如初翰林史珥爲之傳

府志

董宗德字崇本德興人雍正進士就聘湖北鄉試同考
監試魯之裕一見許之且曰得士百不如識董君一旋
選蓋平知縣親老改近補廣東陽春俗奢靡示以勤儉
作勸民歌語意真摯婦孺能習之讞獄多平反不畏強
禦外艱歸德興東路爲徽浙孔道宗德先世嘗建仁壽
橋利行旅歲久圯宗德重建之表曰修爲之記

府志
縣志

聶位中字致和萬年人雍正進士改庶吉士宏才博學
著作繁夥旣入詞垣以母老乞歸敝裘徒步如未第時

縣志

朱來繡字君裳浮梁人諸生性純孝慷慨有大節以明理適用爲學治喪葬一本文公家禮嘗爲縣志考誤摘謬二書時論題之

府志

王飛熊字維師萬年人歲貢生就職訓導天性孝友力學不怠與鄱陽王言綸史簡史白樂平李英王從先爲

心性交

府志

劉繼字介融樂平人乾隆鄉舉官廣東鶴山知縣鶴山諸生多他縣佔籍者繼革其弊立義學講文藝利名遂盛邑舊無志創爲之洎去任鶴山人祀之義學中尋調

電白以父憂歸

府志

李肖筠字松友鄱陽人乾隆進士授工部主事用薦擢郎中出典湖北試分校禮闈所得多知名士久官京師

與法式善李如筠善作爲詩歌互相贈答京察入一等

旋卒

府志

汪正澤字虛谷耳黃子乾隆進士浙江知縣權青田興利革弊民感其德旣去民尸祝之尋授武義莅官三年

多善政

府志

齊躍龍字際飛德興人乾隆鄉舉官東鄉訓導清謹剛介其訓士先德行而後文藝多所造就學宗宋儒論朱

陸同異甚悉

府志

葉宏字又芹浮梁人乾隆進士戶部主事遷郎中英敏諳練吏不能欺時擬定金川西陲事倍於昔宏理度支規畫咸中嘗充會試同考典試山東皆得人以疾卒於

官

府志

程矩字自達鄱陽人乾隆進士貴州安南知縣安南夷民雜處風氣獍狒或結苗人誘爲奸利矩禁民毋入苗洞延師課士以開文教調知婺川民慄悍以殺爲戲傾陷良懦屢成疑獄矩廉得數人悉置於法豪猾憚之移權青溪有獄囚當大辟矩疑之請再鞠遂白時有婺川囚簡雍與同狴犴詢得生之由曰吾青谿程侯活我也雍曰是吾婺川程侯也其見愛於民如此累遷平越知府以勞疾乞休歸

府志縣志

鄧夢琴字虞揮浮梁人乾隆進士授四川碁江知縣兩權江津平反三冤獄有名於時以憂歸起授陝西洵陽知縣洵陽環山臨漢五方雄處爲盜賊藪夢琴詰奸除暴逆旅設冊舟置牌循環連絡數百里山行水宿晏然

無警值歲大歉勸平糶懲強借所活無算棚民墾山率
佔人舊業紛亂不可理夢琴爲定約以五年償開墾費
逾期歸舊主民用以安山南州縣積歲開墾大府檄升
科夢琴陳言流民刀耕火耨轉徙無常未可爲定額事
得寢尋調寶雞洛縣東利民渠引沂入渭凡南北注渭
諸渠以次濬治民曰饒富旋擢商州知州進漢中知府
以南鄭知縣議獄失出註吏議當解任大府以邪匪方
熾檄留防守積勞引疾歸夢琴自少遊漳浦蔡新之門
窺閩學源流終身守師說嘗曰古之人先治己之好惡
聽訟則察人之好惡爲好惡當官難於慎守官難於正
求其難焉可也旣歸優游林下重宴鹿鳴年八十五卒
祀鄉賢洵陽寶雞商州漢中皆祀名宦子傳安自有傳

府志
縣志

史斑字徵可鄱陽人少孤力學貧不改操乾隆進士官
廣西興業知縣與民休息不嚴而治嘗兼攝博白歲饑
發廩賑貸兩邑皆安以病乞休囊無餘蓄後卒於鬱林

府志

胡增字秉毅萬年人乾隆鄉舉大挑知縣發河工借補
獲嘉縣丞歲荒散賑吏不敢蠹尋權縣事以軍功擢山
東泉河通判歷覽十七州縣水利輕騎減從民無苛擾
尋調東昌下河通判歲旱漕艘阻滯增出新意置混江
犁爲攪關法運道遂通所置犁今猶稱胡公犁擢泲河
同知兼轄江南豐沛水利歲修嵇料依時價給值無所
科派總河重之調河南黃沁同知以足疾乞歸

府志
縣志

史珥字師戢鄱陽人乾隆進士改庶吉士散館授主事
乞歸養母奉侍孝謹珥有文學尤留意鄉邦典故志乘
所遺悉蒐輯著於篇

府志

詹昊字筠亭鄱陽人乾隆鄉舉官廣東知縣初權碣石
鎮同知值歲旱禱雨立應攝新甯縣至官數月訟獄衰
息奉檄充同考官適安南人貿易內地嘯聚爲亂官軍
剿之賊四逸代縣事者乃指遭風海舶以爲賊黨械送
於省已誣服昊出關秉燭研鞫知其無辜漏三下馳謁
臬司力請得免邑西鄉有錫礦牟利者言於大府檄開
之昊力爭而止洎昊去官礦卒開殘民命無數僉服其
遠識題補澄邁爲竊盜充斥之區晝夜嚴緝境以無事
五指山黎民蠢動永甯巡檢被害省調兵討之昊理軍

餉倉猝無少誤。猺民習雞卜。禳禱捕盜官欲坐以邪教。

吳訊而釋之。凡百三十餘人。旋以疾乞歸卒。

府志

張宿字月鹿。德興人。乾隆鄉舉。官永新教諭。既解官。就

聘。驚湖白鹿院。長大書孝弟忠信禮義廉恥字勒石講

堂以勸學者。工書畫。旁及形家言。並有著述。

府志
縣志

王朝翰字拱垣。萬年人。乾隆進士。廣東普甯知縣。折獄

明決。邑頌神君。一爲鄉閭同考官。得士七人。皆名宿。旋

引疾歸。

府志

胡翹元字羽堯。樂平人。幼穎異。九歲能文。乾隆進士官

翰林院編修。改御史。擢給事中。骨鯁敢言。遷鴻臚寺卿。

視學山東。既至。登州病甚。猶強自衡校。或勸少休。不可。

遂卒。

府志

周大烜字宣儀鄱陽人乾隆鄉舉官黔中權歸化廳歸化苗民習有私獻大烜悉卻之苗人畏服調遵義一年

乞歸仿范文正置義田以贍族人

府志

程晉錫字越若鄱陽人乾隆進士直隸井陘知縣判斷明察案無留牘威州書院久廢晉錫振興之旋調清苑直隸總督楊廷璋重其才有州縣中第一之目每有疑獄輒命讞鞠晉錫多所平反卒於官喪歸士民泣涕送

焉

府志

董維城字邁三德興人乾隆進士資陽知縣歲饑出己貲爲賑會丁父憂將歸猶留賑三日而去服除事母不出同年生李維城督學江西將拔郡戒子弟勿出就試其潔己類如此

府志

周崧曉字翰宣鄱陽人父銘詒進士歷官山西知縣所至有聲擢禮部主事崧曉登乾隆進士湖南瀏陽知縣再補陝西藍田調涇陽吏治廉察長於聽斷豫商李某與劉某賈於秦劉隱資巨萬李訟之不得直籲於大府願就質藍田令雖不白無悔大府允之一鞠得實藍田倉穀數萬陳陳相因崧曉去官代者難之民乞於新令曰周候活我多矣其陳者願以借民毋累侯且侯廉吏也何以償其得民如此歷涇陽渭南平漢回械鬪之案全活甚眾以勞疾卒子彥自有傳

府志

汪注字欲括浮梁人初由拔貢生官定南訓導乾隆戊戌成進士改庶吉士散館選廣東合浦知縣修廢墜詰奸究綜密條貫上官倚之歷權博羅石城新會諸縣皆

有聲旣薦卓異改順德嚴行保甲獲巨盜置之法擢湖南寶慶府理峯同知官舍在萬山之巔溪崗奧窔四面皆苗種注至布立恩信延袤千里無不率服復權岳郴
澧靖諸州年七十四卒

府志
縣志

王朝瑞字紀雲萬年人與弟朝渠同鄉舉由大挑授義甯州訓導距朝渠去官甫三載弟兄繼爲儒官品學粹美士風振起在官十年卒朝瑞通經尤究心韻學

府志

王朝渠字揆方朝瑞弟乾隆鄉舉由大挑官義甯州訓導薦擢直隸甯河知縣政以育材爲務有循吏稱目疾乞歸其治經不爲空譚尤嫻鄉邦掌故著述甚富

縣志

胡克家字占蒙鄱陽人乾隆進士授刑部主事擢郎中充廣東正考官會試同考官尋授廣東惠潮嘉道先後

禽治海寇沈盜舟無算會博羅囚越獄縣令匿不告事
發部議落職

上以克家罪止失察改留任遷河南開歸陳許道衡樓河隄接
金門勢危險克家立壩上不動萬眾併力工卒以固事
間加按察使銜旋授湖北按察使進江蘇布政使擢刑部右侍
郎授漕運總督屬山陽知縣王仲漢壽同官李毓昌事
發克家嘗權按察使部議復落職留河工效力起淮安
知府以漕艘全運渡河進秩尋擢江甯布政使時克家
方治李家樓河工隄合復圯風雨大作克家露立治事
厯五晝夜隄復合總督百齡上其事請仍留河工許之
未幾擢安徽巡撫鳳陽額竈間多盜有紅髮捻諸目克
家禽其渠置重典又獲湖北賊李珠王三保徐良璧諸

人調江蘇巡撫坐所屬通賦多議降秩復坐丹徒令楊超鐸之事再干吏議

上恩命留任卒於官克家問學淹貫好汲引後進嘗校刊宋尤

延之本文選及資治通鑑世稱善本子承康官按察司

經歷

本傳
府志

張司直字東湖餘干人乾隆鄉舉大挑教諭選萍鄉識

劉鳳誥於諸生中卒爲名臣去官久萍鄉人猶思慕不

衰調金谿教諭卒

府志

余廷塏字西坪德興人乾隆進士授兵部主事累官郎

中出爲山西潞安知府旋調平陽郡人士苦失學科第

久衰廷塏爲振興之一歲中舉鄉榜者十有一人尤善

察吏屬僚有嫉惡過嚴者將呈吏議廷塏調護甚力後

其人卒致高位人服其精鑑

府志
縣志

程華字西清晉錫子由謄錄議敘州同分省山東權知
霑化縣事時方水災華按戶請賑上官不可華爭之甚
力及勘災者至欲減戶口華爭益力上官鑒其誠允所
請華復出己貲爲粥以助賑次年旱亦如之復議修城
以役代賑民賴以生報政第一擢壽張知縣弛挑河之
役民甚德之

府志
縣志

李戴春字虞南鄱陽人父中龍進士早卒戴春拔貢生
官廣東知縣嘗權欽州知州地故多盜凡有訃鞠必得
其情盜亦畏服不敢出呼爲李青天累官瓊州知府盜
首梁文科等累言願投誠須李青天一來大吏檄戴春
往先後撫一千七百餘人調山東青州兩廣總督那彥

成復奏調廣東雷州已積勞成疾未及至卒

府志縣志

計大受字曰容鄱陽人歲貢生好古積學以主敬存誠爲本平生篤孝信於鄉里

府志

汪曰偉字曜九樂平人拔貢生歷官崇仁上高教諭嗜輿地之學嘗爲黃運兩河各直省水道考

府志

鄭鳳儀字蓉裳浮梁人諸生性穎異嘗負笈遊關中考論金石校訂古籍歸就聘紹文院長從遊甚眾弟鳳騰鳳書並鄉舉積學勵行友愛無間時稱三鳳

府志

徐澄字立夫鄱陽人歲貢生志行堅卓不爲俗移從遊者甚多常著尚書集錄以補前人所未有

府志

易履嘉字楚良安仁人恩貢生官建昌縣學教諭學以主敬實踐爲宗有司聞其風輒致尊禮

府志

朱元字次亨樂平人歲貢生通經學周易春秋皆有論

說府志

戴如芹樂平人諸生五歲父講忠孝經輒能解悟既長
傍舍授讀資束脩以養親朝夕問視父病瀕危嘗糞味
甘醫者謂病將劇如芹旦夕禱天願以身代旬日竟愈
母程患目翳如芹舐之目復明有薄田二畝將卒以屬
其子曰吾嘗營此爲養祭資死後勿棄取粟以薦我父
母如我生也後其田產粟一莖四穗者二年人稱孝感
事

聞旌表建坊府志

蔣榮萬年人力農有積穀六百石邑東有地曰蘇塘鋪
人家臨水居疊亂石爲橋水涸可涉遇潦輒因榮忽語

人曰吾欲建大橋使徒行者無苦羣聚而笑之榮乃自
斲其指誓必成罄所儲建橋不給復毀家得三十金益
之遠近慕其義醵金相助橋成更名七星邑令王萬鎰
爲記

府志

周家銳字敬亭鄱陽人嘉慶進士福建順昌知縣調四
川安岳爲政明恕置廣濟莊賑卹貧戶移權閬中後再
任安岳父老歡呼比之張乖崖復還益州也

府志

汪守和字惟衣樂平人父士誥拔貢生宜黃教諭工詩
古文守和初由拔貢官新喻教諭嘉慶元年一甲二名
進士授編修充順天鄉試同考官起居注官進贊善歷
洗馬充會試同考官累遷奉天府府丞父憂歸起補少
詹事充文淵閣直閣事山東考官尋授內閣學士兼禮

部侍郎教習庶吉士坐事降二級出爲浙江學政旋丁母憂歸起補原官復充文淵閣直閣事歷禮部左右侍郎督安徽學政調戶部左侍郎充漢教習閱卷官覆試嚴核得字蹟不符者十五人

上嘉之後充武會試正考官

賜紫禁城騎馬戶部書吏滋弊凡舊堂官皆下部議守和議降調

上改留任出爲江蘇學政擢禮部尚書再充武鄉試正考官權吏部尚書年七十頌

御書寅清受祉及壽佛如意諸珍賞充順天鄉試副考官再調禮部尚書權都察院左都御史守和根柢實學歷官四十餘年以恭謹受

主知屢掌文衡皆稱得士卒於位贈太子太保

賜祭葬子體孚工部主事

本傳
府志

鄒家燮字秀升樂平人嘉慶六年一甲三名進士授編修出典貴州試號稱得人轉御史時總兵有指名揀員者家燮謂不第凌躐銓序亦難保無阿私所好上章論之江西巡撫請設總局句稽積案家燮疏陳其失謂恐開需索之門啟招搖之習訐告愈滋延累益甚皆如所請尋巡視南城擢給事中稽查祿米南新諸倉卒於官

府志

鄧傳安字盱原夢琴子少負異稟年十四誦十三經強記無遺長工古文有名一時成嘉慶進士官福建知縣歷權羅源武平閩縣除暴卹災並有實政遷鹿仔港理

番同知番俗好鬪輒挾刃尋讎傳安立約九條宣播威德番人大服臺灣奸民某聚黨焚掠同官噤不敢治傳安出方略立翦巨憝上官倚之兩攝臺灣知府旋真授權臺澎道兼提督學政入

觀奏對移時

上有好官之論未幾調建甯致仕歸

府志

何觀海字達源鄱陽人嘉慶進士湖南嘉禾知縣調芷江芷江有地名六里與貴州玉屏州毘連民苦舊縣官煩擾訴於督撫請以六里隸黔省下使臣會勘仍隸湖南大吏以觀海才機治之觀海兼程進懲前官僕隸之殃民者四境大悅輸納恐後改權桂陽知州調宜章嚴於治盜勤於訓士三充鄉試同考官皆得人以親老乞

歸士民遮留不獲醵金贈行又不受歌頌成集子桂芳

進士戶部主事

府志
縣志

周鳳喈字安重邵陽人嘉慶進士廣西靈川知縣地雜
獠獍貴銀賤穀舊事兵米徵銀民以爲病鳳喈至改徵
米權呼載道俗無賴子多發邱壠廉其實寘於法以憂
歸起兵馬司正指揮選貴州餘慶知縣改山東新城屢
平爭田諸獄嚴治私鬪鄰邑均蒙其利屬蝗起獨新城
禾稼無損人以爲德政所感

府志

程題雁字賓秋鄱陽人嘉慶進士授內閣中書改選知
縣初官山東長山值歲旱粟貴民譁於市題雁撫慰周
摯稍散去露立禱雨甘澍隨下民大悅調知聊城衝劇
多盜捕役貧黎賊以爲利題雁察其情增役工食懸賞

購盜盜衰息旋乞養歸

府志縣志

劉冀程萬年人嘉慶進士改庶吉士散館授湖北安化縣知縣期年盜賊屏迹麥穗兩岐調衡陽以養母歸冀程正直不阿夙遊幕名公卿聞山陽汪廷珍侯官林則徐安化陶澍樂平汪守和並推許焉

府志

周彥字潤東崧曉子嘉慶進士授兵部主事歷官御史道光八年黃河決淮徐六縣災彥疏請賑并上治河十策十二年從平臺灣

賞戴花翎授臺灣知府清遺孽肅海防保甲義倉學校書院次

第舉行升浙江甯紹台兵備道旋告歸

府志縣志

程鈺字廷璧鄱陽人嘉慶鄉舉大挑知縣發安徽權英山縣事補穎上知縣舉卓異咸豐四年檄調正陽關防

堵粵賊賊間道陷縣城救援不及遂落賊旋以功開復
加同知銜仍權潁上擒匪合粵賊大隊圍城城中兵勇
僅二百餘人鉅誓以死守歷四十三日圍始解敘功進
知府

賈戴花翎權潁州府事攻拔沙河北岸諸賊巢加按察使銜擢

徽甯池太廣道乞病歸卒祀安徽名宦

府志

汪鳳臨字碧梧樂平人嘉慶武進士授三等侍衛河南
陳州都司會教匪李文成亂調滑縣軍營獲賊宋光成
等十三人嘗率百人渡黃河遇竄賊千餘擊敗之威名
大著防守考城賊不敢犯蘭陽諸縣藉以爲屏蔽上功
賈戴花翎滑縣新設都司巡撫方受疇卽以鳳臨薦部議從之
累官定廣協副將權威甯鎮總兵仁懷賊起鳳臨率兵

進討力戰焚巢禽賊渠穆繼賢妖婦謝富英等雲貴總督伊里布奏其功加總兵銜補威甯總兵卒子殿魁武

舉

本傳
府志

汪道誠字勉旃樂平人嘉慶十四年一甲一名武進士授頭等侍衛福建詔安營遊擊擢泉州城守營叅將總督趙慎畛薦其才進署督標中營副將旋授福建協副將總督孫爾準再薦之擢直隸天津鎮總兵尋調雲南鶴麗改浙江處州權浙江提督未幾擢雲南提督騰越南甸夷刁承緒結野夷倡亂屢挫官軍道誠馳勦之禽賊渠治如律在官六年積俸置田歲以所入爲士卒婚喪賞卹費牒總督刊石記之以老致仕予食半俸卒諡勤果道誠軀幹奇偉頗通兵家言嘗創六合長矛陣有

圖說藏於家子茹連福建甌甯縣縣丞陣亡予五品銜
世襲雲騎尉茹鑑戶部主事福建補用道孫普恭漳州
都司

本傳
府志

蘇兆熊字礪溪鄱陽人嘉慶間以武生隸饒州營授貴
溪汛把總檄防九江拒湖北教匪進勦義甯州賊皆有
功擢撫州營千總權右營守備勦擒匪禽其渠巡撫先
福以

聞擢廣東南韶鎮標右營守備調左營檄權右營都司先後獲
會匪謝兆中等九十八人授左營都司累遷潮州總兵
權廣東提督翁源始興會匪雜起兆熊獲賊二百餘人
事遂定擢廣西提督湖南猺趙金隴倡亂兆熊奉

詔防粵邊金隴將竄九疑廣東連州猺應之有

旨以兆熊權廣東提督仍暫留廣西猺潛入綏州茂古洞四出
焚掠兆熊擊散其眾賀縣猺盤均華亦與金隴相應兆
熊回軍邀擊於芳林渡一戰滅之犁頭山猺聞風乞降
兆熊親為安撫各路肅清

上嘉其調度有方交部優敘尋以病乞歸卒子孟暘進士自有

傳仲鴻運庫大使

本傳府志

曹案字同寅鄱陽人歲貢生就職訓導性孝友為學勤
苦去私寡過恆若不及年七十七端坐而卒

府志

蘇孟暘字震伯兆熊子道光進士改庶吉士散館授吏
部主事孟暘工詩與弟仲鴻並有名子雲徵浙江縣丞
殉粵賊難

賜卹如例次輅進士蚤卒

縣志

但紳字榮翰鄱陽人事母盡孝工詩能文章道光進士
戶部主事時粵賊起軍書旁午紳兼治官票所寶鈔局
始終勤事以母憂歸

府志

石景芬字芸齋樂平人道光進士由工部主事洊歷科
道遇事敢言出爲平涼知府權安肅道勦逆番有功旋
丁內外艱在籍練兵敗賊於古城寨尋自浙赴都浙撫
黃宗漢奏留之從克上海

賞戴花翎振勇巴圖魯未幾授金華知府擢四川鹽茶道加鹽
運使銜江督何桂清請留治皖南軍務改皖南道加按
察使銜被議落職遂歸倡鄉兵攻克景德鎮開復原官
奉檄督饒州團練賊平主講濂溪書院卒年七十七

采訪

實事

王鳳城字見善

兼善一作樂

平人道光閒舉武鄉試身長八

尺多力善射咸豐五年賊竄樂平掠山鄉鳳城奮鐵棒擊之賊驚走七年賊踞三溪自南邨嶺入犯鳳城率鄉勇左右合擊斬黃衣賊目一餘黨數十人賊大敗越日

勦三茅蓬復斬十八人逐至蕪田伏賊起鳳城力戰手

刃二十三人遂死

府志忠義錄

黃醇熙字子春祁陽人道光進士歷署湖南綏甯會同知縣以剛直忤上官引疾去咸豐三年巡撫駱秉章知其才強起之署湘鄉縣三月大治旋以父憂解任時祁陽淪於賊閒道奔喪葬畢奉母至楚秉章令募勇士千六百人防省垣九年石達開竄寶慶醇熙會勦敗賊於渡頭橋合叅將陳品南之師敗別賊於牛角灣再敗之

寶識邨悉破賊壘餘黨竄嶺東嶺東賊何文彪與相應
地險賊悍醇熙出奇計夜襲之賊焚巢遁整旅追擊禽
文彪於藍山逆酋賴裕新竄江藍廳醇熙回援破牛尾
嶺木城並毀附近諸巢累遷知府留湖南補用廣東賊
彭大順陷宜章隨陷桂陽醇熙敗賊於宜章連戰黃土
坳赤石司皆大捷疾趨桂陽復其城追擊二十餘里奪
還所虜男女千餘人以功擢湖南道員加按察使銜十
一年略秉章入蜀醇熙將湘勇三千人爲前驅五月解
定遠圍斬賊首何某收降衆萬餘人賊彭紹福屯二郎
場深阻山谷醇熙進勦之相距二十里使偵賊蹤不得
見次日未明馳至燕子窩遇賊騎數十逐之繞山而走
醇熙知有伏分軍搜山遠近伏賊皆起我軍少偏處阡

陷溝塹間泥淖數尺不能成列左右請退叱曰退則軍無噍類矣搏戰益力凡所殺數百人賊至益眾醇熙策馬突陣嬰重傷踏地賊擁至二郎場復甦迫之跪罵曰吾豈跪賊者賊怒斷左足右臂益大罵遂支解之燔其屍

詔贈布政使諡忠壯予世襲騎都尉順慶府殉難處建立專祠
秉章奏醇熙才識器量爲于成龍趙申喬流亞請將生平事績宣付史館

詔允之

府志忠義錄

楊重雅字慶伯德興人道光進士改庶吉士散館授檢討累擢四川順慶知府值歲饑開倉以賑修城外石隄民利頌之咸豐十年移成都蜀寇方張省會戒嚴重雅

晝夜巡城不就枕者七十二日賊聞有備不敢犯明年
奉檄辦民團仍駐順慶順慶當孔道重雅度賊必至議
清野計而念城外四千家焚之可憫乃築外城周之未
幾賊至眾號十里重雅躬冒矢石出奇奮擊涉旬而圍
解別賊方攻遂甯率五百人夜襲其壘賊驚遁川督駱
秉章莅任知重雅才仍令攝成都秉章規畫全蜀功在
西南重雅與有勞焉廣安營山民變聚眾各數萬重雅
單騎往撫眾憚其威卽解散歷遷四川按察使同治六
年母憂歸服闋移甘肅總督左宗棠議分甘肅鄉闈重
雅力贊之督建貢院尅期竣工光緒元年擢廣西布政
使三年晉巡撫廣西兵燹地瘡痍未甦伏莽亦間作重
雅講求吏治寢食不遑全州懷遠博白諸土盜起次第

削平叛將李揚材擾越南提督馮子材出關剿賊重雅
籌濟軍饒毋使匱乏師遂克捷五年奉

召入都行至湖南卒

采訪事實

楊鄭白字西渠德興人拔貢生分發山東知縣歷任高
唐商河青城以政績著調署金鄉咸豐三年河決豐口
死者相枕藉鄭白借鄰縣倉穀賑之民大洽金鄉當衝
道羣寇出沒鄭白慮兵少自練鄉勇五百人掘地得礮
六十具修城堞製火藥爲固守計四年粵賊數萬渡河
入縣境鄭白禦之李家園不利乃入城登陴固守士民
懷其德誓與俱死矢石罄爭揭城上輒投之殺傷頗多
賊憤甚積薪燒城遂陷鄭白巷戰死妻邵及二女俱從
死

詔贈知府于世職金鄉建專祠幕下士劉應謙顏寶森鄧毓秀

一作竹秀曹定卿一作鎮銜葉小敏同殉附祀之府志忠義錄

吳清如字鑑開樂平人諸生資敏學邃博極羣書平生

方正自持嘗作崇正論以闡釋氏縣志

許宸字星北樂平人諸生束髮能文潛心理學纂輯儒

先粹語成書十數卷曰破誣錄經時要略府志

葉瑤生字維玉樂平人誠樸無偽淹貫羣書家素寒以

禮義自守無所依阿著書終其身府志

薛樓生德興人家貧偕其弟力作奉事父母父歿母病

顛梳髮納履兄弟同任之樓生嘗爲人傭工食必舍肉

歸以遺母母少愈恆負之出遊以爲娛悅二十餘年不

少懈府志

蔣善慶萬年人九歲喪父與兄福慶事母均以孝聞年十六兄從役北上奉母愈謹未幾母卒慟絕者再厝棺山原居廬五月俟兄歸乃葬旣而兄病日夜侍湯藥不痊善慶以慟兄故後十四日亦卒臨卒訣家人曰吾與兄同生同死抑又何恨獨惜不能爲父母光泉壤耳聞者哀之

府志
縣志

蔡有福字子宜樂平人年十二母病篤焚香籲天願以身代母病頓愈其後遭喪痛哭幾絕廬墓三年卒祀孝

子祠

府志

徐肇惠字養心鄱陽人服賈於湖南北有義聲江右大饑肇惠方在楚急糴米連艘運歸減價平糶復爲粥食饑者施棺瘞死者捐金甚鉅一時頌之

府志

胡鑑字睿藻鄱陽人以貲官州同好義樂施輸金修文廟子浚敦古處能繼父志獨修郡學崇聖祠有司欲上其事父子並固辭同時胡友謙其先嫠人寄籍德興亦好義嘗出金建考舍

府志

徐嘉健字天行鄱陽人貢生學於鹿洞東山諸書院既歸教授鄉里言動有法以宋五子書爲學者講治心之

要

府志

吳道心字世孚鄱陽人諸生性耽學靜默自得嘗作天人理氣圖說

府志

章穆字深遠鄱陽人諸生敏勤好學無所不覽通曉人書兼工醫著食物辨六卷教人知攝生之法平生好蓄書搜羅甚富再燬於水火晚年默記亡書猶對客誦之

自號杏雲老人

府志

董和遠字有望德與人性至孝親病嘗糞無難色里中失火延及其屋和遠父母不能脫冒火救之髮膚焦灼猶恐貽父母憂諱言其傷

府志

周福臣安仁人生數月而孤髫齡事母能盡孝比長力田供養出告反面循禮如士夫母素畏雷雷作輒拜禱乞免母驚居喪哀毀骨立廬墓三年墓去家半里服既闋每飯必往奠食風雨寒暑不廢

府志

程大猷字雪濤鄱陽人諸生殫心性理事親怡然母病日夜侍湯藥須臾不離既遭喪勺水不食者數日恆恐傷父意私往母墓哭焉父好施常質衣裘助之自幼好學父以體弱禁之輒掩鐙夜讀病革猶手一編招諸弟

與二子講解且哦且頷而卒

府志

蔡應龍字汝翼樂平人家世材武以行伍從征廣西積功擢湖南提標後營千總署前營守備湖南提督向榮所部號善戰者應龍與秦如虎名尤著戰於永安州軍不利榮馬中礮應龍下馬授榮翼榮奪圍出後轉戰湖南北江西安徽江南以功遷雲南楚雄協副將咸豐五年應龍從提督張國樑破賊六合國樑服其忠勇與締姻焉六年三月賊踞甯國應龍以本部二千人倍道往援屢敗賊賊將謀遁應龍復陳兵油榨河遏其去路賊計窮糾黨死戰眾寡不敵應龍所部健將遊擊楊瑞乾都司楊萬青先後戰沒應龍被重傷猶相持久之力竭始驅馬赴河死子其榮初効力海疆以功授廣西融懷

千總道光二十八年平楚匪雷再浩有功三十年從向榮擊廣西金田賊擢桂林營守備應龍沒後其榮留江南引軍克句容攻鎮江敗賊於高資累遷至副將以傷病假歸咸豐九年提督和春檄回營督南路兵勇連克江甯水西門外江東橋賊營十年大營被襲退丹陽閏三月從張國樑戰於南門橋死之應龍從子其驃廣西守備咸豐七年隨其榮克句容諸城屢遷至叅將八年春攻秣陵關三汊河賊壘擢義甯協副將九年攻六合偪城而營值援賊大至戰於紅山窰援絕餉盡其驃忿甚突賊陣中槍死事

聞先後得

旨優卹應龍

賜諡勇介其榮諡威烈其驃諡剛愍

府志忠義錄

李逢春餘千人武生隸九江鎮標累擢叅將咸豐五年
侍郎曾國藩治兵南康以知府劉于潯新立江軍檄逢
春佐之七年攻臨江敗援賊十餘萬旋克豐城下新淦
奪臨瑞河口賊船遂復臨江踰年復撫州大小數百戰
逢春之力爲多九年從攻景德鎮率本部越馬鞍山擊
賊賊悉眾迎拒潛以別隊襲我後路諸軍潰逢春憤甚
馳馬突陣爲礮子所傷被圍急長子廷棟單騎入救之
遂同戰沒明日得其屍於土地祠前戎服倚火槍坐如
生時

詔贈副將子諡壯愍原籍及陣亡處皆建專祠並贈廷棟都司

耐焉

府志忠義錄

汪茹連字魯巖樂平人以縣丞分發福建厯署福安仙游知縣補甌甯嵐下縣丞防勦紅巾賊斬馘甚多賊銜之咸豐六年大隊犯嵐下茹連禦之賊皆殊死戰茹連中槍猶手刃數賊而歿所部略盡

詔贈五品銜予世職建立專祠妾林氏亦善戰同歿於陣特諡

節烈

府志忠義錄

童南友樂平人監生

貢生一作

寓浮梁李邨咸豐三年賊犯

江西南友謀於眾募勇四百人備戰守八月賊陷景德鎮分掠李邨南友率其子武生國英截擊於馬鞍山斬一百七十餘級賊敗走都昌民曹湘導賊再至國英戰不勝欲負南友走叱曰我今日志在必死汝速去圖再舉俱死無益也遂力戰死國英亦以八年十二月殉於

黃泥頭

縣志忠義錄

石兆桂字一枝樂平人賊犯江西集團練自守咸豐六年賊至厚田邨兆桂偕邑人石恩福石廷坤石禮舟等邀擊之賊遽退邨在樂平縣北十里南有五雷山高數十仞東西麓皆有小徑徑容一二人一水繞山南曰馬家港兆桂策賊必復至伏驍銳東西挺刃以待未幾賊果分道入伏兵驟起殺前進者二百餘人後隊賊千餘隔於山港不能救遂敗竄禮舟等追殲之七年正月賊踞龍珠蓀田諸邨囂聲振山谷兆桂曰賊不整易敗也乃縱火於五雷山巔自率死士乘夜擊蓀田賊皆棄壘走越日龍珠賊亦引去五月賊據縣城別賊據鄱陽鳳岡邨介其中兆桂謀先擊城賊合圍丁三千偪城下戰

失利族人平淮等死之兆桂殿爲賊所及奮矛刺一騎

墮地又一騎至又刺之羣賊麕至遂被戕

縣志忠義錄

方隆弼樂平人嚴毅有智略咸豐七年與從兄雪昌分
領團勇駐員水斥堠嚴明爲賊所憚六月賊自景德鎮
竄八澗橋隆弼擊走之於是會東北鄉諸團合萬餘人
進駐三溪賊四萬由楊家陂擁至隆弼雪昌選精銳出
中路迎敵分左右兩翼緣山夾擊斃賊千餘追奔二十
五里乃合官軍駐樂平城東賊由北門出截殺百餘人
賊竄鄱陽遂復縣城九月隆弼雪昌復合諸團襲賊營
殺其酋何益生胡有容生禽賊首七斬獲千計奉檄進
剿復敗賊於吳開嶺追至蕪田武舉王鳳城戰沒賊乘
勝自白鷺港渡河隆弼據浮橋扼之勇目高發光連斬

數賊胡四保方元喜等繼之石開榜徐正員等由雞腳嶺下擊賊始退閱月復至隆弼雪昌各率千餘人由金雞壩進禽馘數百賊大潰遂攻景德鎮復之與官軍分屯八年五月擊賊於梘頭街追過河橋賊窮蹙死關天已黑河湍橋狹我軍未盡渡隆弼無援遂戰死次日官軍出逐賊獲隆弼尸瘞之

縣志忠義錄

鮑家驄字聖祥樂平人讀書尙氣節粵賊至家驄約近鄉三十八族舉行團練書門帖云紆難毀家挑起英雄擔子成仁取義打開生死關頭見者皆感奮咸豐八年道員王文瑞統副湘營攻安仁檄家驄會勦家驄以母王氏年七十難之母慨然曰兒當矢志爲國毋以我爲念家驄遂行比至安仁湘營已收隊去乃營於城外次

日賊出盪家驄以孤軍力戰死文瑞嘆曰彼果來是吾
過也率師復進賊敗走遂以其屍還諸鄉團咸致賻母
謝曰家驄死義是其志也願公等奮力殺賊毋以此自
沮拜賜多矣謹辭賻

縣志
忠義錄

余東旺安仁人初爲人傭同治初赴陝從軍充勃勇營
哨官攻克西大峪清水諸賊堡沿黃河追勦至甯夏復
靈川諸城斬僞王僞帥千餘人積功遷副將加總兵銜
雄勇巴圖魯東旺益自奮尋以中衛回民倡亂督軍勦
之乘勝深入戰歿於狄道之康家崖入祀忠義祠

義
錄

府志
忠

江西通志卷一百六十四

列傳三十一

南康府

晉

周續之字道祖雁門人其先過江居建昌八歲喪母哀戚過於成人奉兄如事父太守范甯立學集徒續之年十二詣甯受業數年通五經五緯號曰十經名冠同門稱爲顏子旣而閒居讀易老入廬山事沙門慧遠時彭城劉遺民遁迹廬山陶淵明亦不應徵命謂之潯陽三隱嘗以嵇康高士傳得出處之美因爲之注武帝遣使迎之禮賜甚厚每曰真高士也通毛詩六義及禮論注公羊傳

南史

後梁

增

李遷哲字彥安南康人後梁明帝時黔陽蠻田等鈔掠江中為患遷哲出討殺獲甚多尋詔遷哲領襄陽陳將章昭達攻偏江陵告急於襄州衛公直令遷哲救之廣

通志 謝志舊案梁時尚無南康軍遷哲常是南康郡人

陳

司馬曷建昌人仕陳為大中大夫性至孝母病亟禱於

先祠願以身代母果得痊

明一統志

司馬延義字希忠建昌人為陳司徒從事中郎事親孝

居喪哀毀朔望詣墓哭奠路旁老柏遂為枯瘁

林志

隋

凌恭字遵德建昌人精通五經埋名晦迹煬帝時召為

學士

林志

唐

張懷約字進宏建昌人初仕隋歸唐爲温州司馬博學強記文詞典麗講三禮三傳出諸儒之右性尚簡約後

隱於當陽山莫知所終

明一統志

郭元靖字長甯建昌人才兼文武隋末與兵保衛鄉里歸唐累官虔撫吉三州司馬衡州刺史所在以廉謹稱

豫章書

徐元之建昌人幼穎悟通經史年十七第進士爲監察

御史累遷邠王府長史改曹州刺史有文集十卷

林志

熊仁瞻洪州海昏縣人性至孝爲袁州宜春縣丞喪母奉柩歸卜葬縣西歸義鄉岡阜險峻喪輿莫能致孝子念非水道不可達誓傾家資掘地爲川以通江方庀工

俄而天大雨水自墓旁近地湧出成川與江流接舟以得達既葬結廬墓側居六年有慈烏來巢之異觀察使路嗣恭以聞敕旌其門爲孝子官至蕭山縣令卒世名其川曰孝子港橋曰孝感橋里曰孝錫坊

王忠文集謝志舊集海

晉漢縣屬豫章郡卽今南康府建昌縣地唐隸洪州宋太平興國七年置南康軍割洪州之建昌隸焉故孝子應入南康然考後漢書海昏自永元十六年分立建昌縣宋元嘉中廢海昏移建昌居焉宋書郡國志唐書地理志洪州所屬縣俱無海昏今傳以孝子爲

洪州海昏縣人不審所據前志未載今補

朱如璧建昌人早孤家貧賣薪易食以養母寒則溫席暑則揮蚊二十餘年無倦采訪使韋虛舟雅重之

安志

朱

洪文撫南康建昌人本姓殷犯宣祖偏諱改焉曾祖謬唐虔州司倉參軍子孫眾多六世義居室無異爨就所

居雷湖北創書舍招來學者至道中本軍以聞遣內侍
裴愈賫御書百軸賜其家文撫遣弟文舉詣闕貢土物
爲謝太宗飛白一軸曰義居人以賜之命文舉爲江州
助教又詔表其門閭自是每歲遣子弟入貢必厚賜答
之文撫兄子待用登咸平進士至都官員外郎宋史謝志舊
案前志洪文撫後有劉彥誠以爲都昌人仲武之父錡
之祖也既又加駁正據宋史劉仲武劉錡傳實秦州人
陝西通志
同故刪

孫琛新淦人父冕請白鹿洞故址爲歸老地詔從之未
歸而卒琛卽其址家焉皇祐中以家資置學館十間扁
曰白鹿書堂以教子弟就學者廩之郭祥正爲記仕至

禮部郎中

林志

陶唐字元堅星子人潛之裔通六經精子史尤長於春

秋發明奧旨後學名士多出其門

林志

李亮采建昌人臨川鄒餘吳履中相繼爲鄂州通城知縣於學宮建資源堂以書幣聘亮采典教事力學以待舉修己以致人士皆樂就之

黃山谷資源堂記

李常字公擇南康軍建昌人也舉進士調江州判官宣州觀察推官發運使楊佐薦改秩常推其友劉琦佐曰不見此風久矣并薦之議者謂常能舉善而謂佐爲知人除祕閣校理熙甯初自太常博士改右正言時方更法常言始建三司條例司已致天下之議至於均輸青苗斂散取息傳會經義人且大駭又言州縣有不散常平錢而但使民出息者詔常具姓名以聞常不以聞遂落校理通判滑州歲餘復職知鄂湖齊三州召爲太常

少卿遷禮部侍郎哲宗立進吏部侍郎常上七事曰崇
廉恥存鄉舉別守宰廢貪賊謹疑獄擇儒師修役法又
論役法差免二科以爲法無新陳便民爲是今使民俱
出資則貧者難辦俱出力則富者難堪盡各從其願庶
幾可久加龍圖閣直學士論取士請分詩賦經義爲兩
科以盡所長改兵部尚書辭不拜出知鄧州徙成都府
而卒年六十四有文集奏議六十卷詩傳十卷元祐會
計錄三十卷常少讀書於廬山五老峯白石庵之僧舍
書幾萬卷既貴思欲遺後之學者乃藏於山中時人目
其居曰李氏藏書山房而蘇軾爲記其事云

東都事略
譚案

四庫全書提要載李彭字商老公擇從孫著有日涉園
集呂居仁江西詩派圖錄黃庭堅以下二十五人彭名
在第十五蘇軾張耒劉義仲皆
與往還舊志無李彭今附錄之

崔閑字誠老星子人讀書不務進取襟懷清曠以琴自娛結廬於玉澗號睡足庵自謂玉澗道人蘇軾過之曰醉翁喜瑯琊山水沈遵以琴寫其聲惜乎無辭今玉澗道人妙於琴故因其聲而爲辭以補石刻在郡齋

林志

陳圓字德方星子人飽學獨行嘗應制科尋隱後山名輩多出其門黃魯直訪之賦詩有域中咫尺雲橫棧獨倚前山望後山之句又名其堂曰獨善

林志

陳慕

一作象

字必正星子人宣和進士少從陳瑩中劉杜

輿蘇養直遊廉靜有守歷任州縣所至有政聲及佐大藩或勸求郡不肯屈節歷倅洪潭明三郡以祖業遜兄初預寄居後山號星灣先生子準字正臣以父蔭補官年五十卽挂冠歸

林志

李公懋字子勉建昌人建炎進士累官江西提舉召對
陳五事擢監察御史高宗駐蹕建康大臣請還臨安公
懋力排秦檜以爲不可疏三上不報出爲湖北提刑累

遷太府少卿終湖南漕

林志

曹興宗字伯起都昌人紹興進士仕至參軍贈光祿大
夫所至政聲藉甚子三人長彥純次彥約俱受業朱子
之門彥約自有傳

人物志

雷渥字朝宗建昌人胡銓一見大嘉賞張栻尤推重之

人物志

蕭之敏字敏中都昌人登進士授監察御史直祕閣江
東提刑所屬無留獄累官吏部侍郎出爲湖南轉運副
使終祕閣修撰周必大銘其墓

縣志

戴師愈星子人博學強記撫廬山古今人物著列傳十三卷又作麻衣易後登隆興進士授湘陰簿自號玉溪

子林

志

曹彥約字簡甫都昌人淳熙進士嘗從朱子講學薛叔似宣撫京湖辟主管機宜文字漢陽闕守檄攝軍事時金人大入郡兵素寡弱彥約搜訪土豪得許高俾總民兵趙觀俾防水道党仲昇將宣撫司軍屯郡城金集兵圍安陸遊騎闖漢川彥約授觀方略結漁戶拒守南河觀逆擊斬其先鋒且遣死士焚其戰艦金人大敗去又遣仲昇劫金人砦殺千餘人以守禦功進秩二等就知漢陽尋提舉湖北常平遷湖南轉運判官時盜羅世傳李元礪等相繼竊發桂陽茶陵安仁三縣皆破彥約至

彼督運人心始定遷知潭州湖南安撫世傳素與元礪有隙至是密請圖元礪以自效彥約錄賞格報世傳遂禽元礪彥約還長沙未幾復出督戰餘黨悉平擢右侍郎官出爲利路轉運判官兼知利州關外乏食彥約悉發本司所儲減價造糶勸分免役通商蠲稅民賴以濟差知甯國府又改知隆興府江西安撫遷大理少卿以寶謨閣待制知成都理宗卽位擢兵部侍郎入對勸帝講學防近習次言當以慶厯元祐聽言爲法以紹聖崇觀諱言爲戒比年以來有以賣直好名之說見於奏章者願陛下倚忠直如著龜去邪佞若蠹賊其有沮撓讜言者必加斥逐會下詔求言彥約薦隆州布衣李心傳素精史學乞官以初品實之史館遷禮部侍郎授兵部

尚書力辭不拜以華文閣學士致仕卒賜諡文簡

宋史

黃灝字商伯南康都昌人入太學擢進士第教授隆興知德化縣以興學校爲本歲饑行賑有方光宗卽位遷太常簿請敕有司取政和冠昏喪葬儀及司馬光高閌等書參訂行之除太府寺丞提舉常州路常平秀州海鹽民伐桑柘毀廬屋孳瑾盈野而州縣方督促逋欠灝見之慨然時有旨倚閣夏稅遂奏乞併閣秋苗不俟報行之言者罪其專移居筠州已而削兩秩灝旣歸里幅巾深衣騎驢匡山閒若素隱者起知信州移廣東提點刑獄告老不赴卒朱子守南康灝執弟子禮質疑問難朱子沒學禁方厲灝單車往赴徘徊不忍去者久之

宋史

白志舊案灝諡
文簡史傳失載

李燔字敬子建昌人紹熙進士授岳州教授未上往建陽從朱子學至岳州教士以古文六藝不因時好以祖母卒解官承重補襄陽教授復往見朱子凡諸生未達者先令訪燔俟有所發乃從而折衷謂人曰他日任斯道者必燔也朱子沒學禁嚴燔率同門往會葬不少怵及詔訪遺逸九江守以燔薦辭郡守請爲白鹿書院堂長學者雲集尋添差江西幹辦公事會洞寇作亂燔請自往分兵守險馳辯士諭賊順逆禍福寇皆帖服洪州地下異時贛江漲而隄壞久雨輒澇燔白於漕帥修之自是田皆沃壤有旨改通判潭州真德秀爲長沙帥一府事咸咨燔不數月辭歸時史彌遠當國自是不復出卒年七十贈直文華閣諡文定燔入仕凡四十二年而

歷官不過七考居家講道學者宗之與黃幹並稱曰黃

李

宋史

馮椅字奇之都昌人受業朱子紹熙進士仕至江西運
幹家居授徒所著易詩書語孟太極圖西銘輯說孝經
章句喪禮小學孔門弟子傳讀史記及詩文志錄合二
百餘卷配饗於學子四人去非自有傳去辨仕至侍郎
去弱知甯國府去疾直徽猷閣

白志

彭尋字師繹都昌人淮甯府學教授南圖之孫有文行

鄉里稱曰東園先生嘉定閒特奏名

林志

彭蠡字師範尋之弟朱子守南康時門人質疑義辨析
甚精爲朱子所重號梅坡先生築室訓徒授業江淮之

上官至吏部尚書贈龍圖閣學士

人物志

彭方字季正都昌人朱子守南康方就學於其門弱冠
魁省闈累官至祭酒兼侍講執事累擢中遷兵部侍郎
請歸加龍圖閣學士諡文定

人物志

馮去非字可遷椅子淳祐進士爲宗學諭丁大全爲左
諫議大夫三學諸生叩闕言不可下詔禁戒詔立石三
學去非不肯書名碑下未幾以言罷歸舟泊金焦山有
僧上謁致大全意願無遽歸少俟收召乃奮然正色曰
老夫今歸廬山不復仕矣絕之不與言

明一統志 謹案人物志稱去

非仕至諫議大夫與宋史明一統志不合當誤

鄧翰字伯衡建昌人理宗朝七歲舉神童科十七登第
授黃梅主簿升江西運幹所在有政聲弟輿字伯載亦
八歲由神童科登第授和州司戶

人物志

熊兆字世卿安義人受業於朱子學得其傳隱居弗耀

自號拙逸子朱子爲說以遺之

白志 原案朱子全集無拙逸子說其裔孫重

錄其文曰熊君世卿乞書拙逸二字余曰作德心逸日休作僞心勞日拙毋乃與子之言異乎君笑曰彼巧者勞智者憂吾惟拙故逸云爾拙非繆悠之謂也物之自然性之天也蔽吾天汨吾自然窮年竟歲方寸擾擾隨富且貴求吾一日之逸有終身不可得者矣余曰意逃世網而解天刑非君其誰哉

陳柘字咸和慕之子任江夏令築隄捍水民德之調善

化佐淮東總幕築楚州城終池州倅

白志

陳柘字秀成柘之弟力學忘倦交遊必擇三試禮部不

第遂棄科舉師事朱子義理益精

白志

胡泳字伯量建昌人嘗從朱子遊不樂仕進學者翕然

尊之稱爲洞源先生從祀白鹿洞三賢祠

白志

周謨字舜弼余宗傑字伯秀李輝字晦叔劉貴字炳文

俱建昌人四人同學於朱子之門並有時名不求仕進

白志

呂炎字德明建昌人與弟呂燾呂煥同遊朱子之門學

成而歸隱居弗仕道德聞望爲時所重

人物志

周耜字植叟星子人性沈靜博雅好古有詩名常侍父

官襄陽帥臣張杓一見奇之待以殊禮晚集文公語錄

以詔後學江東繙使禮聘爲白鹿洞主其講學至老不

倦云

人物志

江萬里字子遠都昌人少神雋有鋒穎連舉於鄉人太

學有文聲理宗在潛邸嘗書其姓名几研間以舍選出

身厯池州教授沿江制置司準備差遣兩浙安撫司幹

辦公事召試館職遷著作佐郎權尚左郎官兼樞密院

檢詳文字知吉州創白鷺洲書院召爲屯田郎官未行
遷直祕閣江西轉運判官兼權知隆興府創宗濂書院
久之以駕部郎官召遷尚右兼侍講史嵩之罷相拜監
察御史遷殿中待御史萬里器望清峻論議風采傾動
一時帝眷注尤厚嘗乞祠省母疾不許屬弟萬頃奉母
歸南康旋以母病聞萬里不俟報馳歸至祁門得訃而
議者謂萬里母死祕不奔喪反挾妾媵自隨於是側目
萬里者相與騰謗萬里無以自解坐是閒廢者十有二
年後陸德輿嘗辨其非辜於帝前賈似道爲京湖宣撫
大使以萬里帶行寶章閣待制爲參謀官元兵圍鄂似
道以右丞兼樞密使移軍漢陽萬里遷刑部侍郎似道
入相萬里兼國子祭酒侍讀入對遷權吏部尚書同僉

書樞密院事隨以言者去官後以原職權福建轉運使
度宗卽位召遷參知政事萬里始雖爲似道用然性峭
直臨事不能無言故每入不能久在位帝在講筵每問
經史疑義及古人姓名似道不能對萬里從旁代對似
道怒謀逐之萬里四乞祠不候報出關後二年知太平
州兼江東轉運使召拜參知政事進封南康郡公旣至
拜左丞相乞祠加觀文殿大學士提舉洞霄宮尋予祠
時年七十有六矣明年元兵渡江萬里隱草野閒爲遊
騎所執大詬欲自戕旣而脫歸先是萬里聞襄樊失守
鑿池芝山後圃扁其亭曰止水人莫喻其意及聞警執
門人陳偉器手曰大勢不可支余雖不在位當與國爲
存亡及饒州城破竟赴止水死左右及子鎬相繼投沼

中積尸如壘事聞贈太傅益國公加贈太師諡文忠

宋史

江萬頃字子玉萬里弟歷守太郡所至以循廉稱知南

劍州內寬外明政教備舉以興學爲第一義嘗增置學

田以助廩餼家居元兵至境委置私第冒險難自都昌

赴饒州兄所偕子鐸俱被執罵賊而死

人物志

陳大猷字文獻都昌人師雙峯饒氏究心理學登進士

歷仕至從政郎改黃州軍判官著尚書集傳

人物志

李成大建昌人登進士德祐初知金壇郡元兵至與戰

不勝吏民脅成大降乃潛與胡用存謀復金壇事泄繫

獄榜掠不屈遂殺其二子以懼之終不屈笑曰子爲父

死臣爲君死卒殺之詔贈直祕閣諡忠節

人物志

陳哇字子從秬之子仕襄陽南漳尉調靖州判官魏了

翁薦之不就以通直郎致仕人壯其勇決祖孫相望皆

盛年納祿云

人物志

王時潛字源魯都昌人隱居不仕累辟皆辭附注禮記

士類宗之

人物志

陳師愷字叔才都昌人專究理學纂書經蔡傳旁通行

於世

人物志

元

陳澔字可久大猷子生於宋季入元不求聞達博學好

古有禮記集註行於世學者稱爲經歸先生年八十有

二卒奎章學士虞集題其墓

人物志宋末遺

謹案陳澔舊列四庫全書例改

初入元初

高必達建昌人五歲時父棄家遠遊莫知所適必達旣

長晝夜哀慕乃娶妻以養母而歷往四方求其父十餘年不得忽傳黃州全真道院中有虛明子者學道三十年矣本姓高氏建昌人也匿姓名爲道人云必達詢問知爲父卽往拜之具言家世及己之所生歲月大父母之喪葬始末因哀號叩頭不已虛明猶瞑坐不顧久之斥曰我非汝父不去何爲必達留侍左右不少懈辭氣哀惻其徒謂虛明曰師有子如此忍弗歸乎虛明不得已乃還家必達孝養篤至鄉里稱之

元史謝志齊案高必達林志訛載

建昌府白志據史改正

葉清叟字澄心星子人博學工詩爲隆興路儒學錄復調南康嘗入廬山采藥遇異人授以奇方遂精於醫子宗仁隱居教授學窮經史授白鹿書院山長遠近宗之

林志

燕公楠字國材建昌人宋禮部侍郎諱之七世孫母雷氏夢五色巨翼入幃遂生公楠十歲能屬文居父喪廬墓三年再貢於鄉不第後以連帥辟五遷至通判贛州事世祖旣平江南帥臣版授同知贛州事以平廣南功遷同知吉州路總管府事召至上都奏對稱旨賜名賽音囊嘉特命參大政辭乞補外除僉江浙行中書省事俄移江淮尚書省立就僉江淮行尚書省事江淮在宋爲邊陲故多閒田公楠請置兩淮屯田勸導有方田日以墾除大司農領八道勸農營田司事興利舉弊績用大著拜江淮行中書省參知政事僧格旣敗而蠹政未盡去公楠赴闕極陳其故請更張以固國本世祖悅會

欲易政府大臣以問公楠公楠薦巴延布呼舍哩奇爾濟蘇等十人又問孰可以爲首相對曰天下人望所屬莫若安圖問其次曰諤勒哲可明日拜諤勒哲爲丞相以公楠及布呼爲平章政事固辭改江浙行中書省參知政事三十年復爲大司農元貞元年進河南行省右丞釐正鹽法民便之召入覲成宗以公楠先帝舊臣慰勞良至改拜江浙行省右丞明年遷湖廣五年召還朝尋卒賻贈有加特命朝臣護喪南歸

元史

陳徵字明善廬山人居吳中嘗從吳澄游學務明理不

慕榮進一時前輩若虞集揭傒斯咸推重之

江南通志

鄭佛生建昌人早孤母病孿貧無以爲養日賣菜歸必爲母盥櫛飼飲食扶掖上下埽除便溺二十餘年始終

弗怠事聞詔表其門

安志 謝志 舊崇安志 星子黃直周機黃虞亦皆以孝義著附錄於此

此

黃異字民同灝之裔少好學讀書於白鹿書院至元進

士為廣東惠州學錄遷南安道源書院山長元季棄官歸隱授徒自號節庵有節庵詩集三十卷子朋克世其

家學

安志

謝珪字西蟾建昌人宋丞相謝方叔四世孫至正閒以

故官子孫授建甯路擢鹽茶提舉克稱厥職

林志

余仁仲星子人至正閒為贛州路知事時尚書噶海

原作

哈參政沁布阿咱爾

原作全普庵撒里

守贛每與仁仲圖議軍

事匡贊甚多丁酉紅巾圍安慶仁仲言於尚書參政曰

安慶圍急當移檄省憲合兵赴援無安慶則江右不可

保既謀不用安慶陷仁仲歎曰國事去矣以疾辭官移

家龍興卒葬西山

府志

明

于光字大用都昌人少有大志初從徐壽輝署江東宣
慰鎮浮梁及陳友諒弑壽輝光以浮梁歸高帝拜行樞
密院判從征屢有功擢鷹揚衛指揮從徐達平淮東浙
西禽張士誠取汴梁克陝洛下潼關佐都督郭興守之
別擊破元左丞李思齊軍徙守鞏昌擴廓帖木兒數犯
邊屢卻之會擴廓偵知大將軍達南還遂襲圍蘭州指
揮張溫堅守光帥師援溫至馬蘭灘一作溪卒遇擴廓軍
戰不勝被執至城下令紿溫降光大呼曰吾不幸而擄
且死公等幸堅守大將軍將至矣元將怒殺光城中守

益堅園遂解上聞使使諭祭配享功臣廟

明史洪英傳 白志

陳汝秩字惟寅本廬山人父徵字明善居吳卒惟寅與弟惟允力貧養母有聞於時惟允爲淮張所辟親信用事聲勢甚重惟寅安貧靜退不能卜一廛饒介之謀僦屋以居倪元鎮爲作疏國初以人才徵至京以母老辭

歸

列朝詩傳

于立字彥威南康人學道會稽山中得石室藏書放浪

江湖閒與顧仲瑛友善於玉山草堂有行窩焉

列朝詩傳 謹

案顧德輝玉山草堂集于立作于立字彥威方外友也居玉山堂者餘三十年後遊會稽復至玉山堂患風痺遇異人投藥而愈見立所撰金粟冢中秋燕集後敘

劉誠字伯實都昌人洪武閒以明經聘授河南新鄭教

諭所著有柏石集十卷

林志

余復升字文秩星子人洪武初以賢良薦授濟南章邱
丞總芻粟給大軍民不勞而事集累官至德州知州
楊淞字公謹建昌人通五經洪武八年以經明行修舉
國子監助教升祭酒

人物志

葉昭字子宣星子人通經術能文善隸高尚氣節洪武
初聘爲南康府學訓導尋以疾辭所著有樵什集子二
曰堅以孝廉薦累官刑部員外郎曰剛嘗割股以孝行

稱林志

查琛字伯玉星子人器量宏遠讀書窺見大義與士大
夫講論古今人物厯厯皆有條貫洪武中以賢良徵年
老不赴其子桴字濟海永樂進士官至禮部祠祭司郎
中以孝友著自號潭隱建龍潭書院

府志

廖敏字悅學星子人洪武中鄉薦選入內閣修永樂太

典任刑部主事宅心公恕讞獄明允爲時所稱

林志

殷革星子人由監生厯官知松江府清慎自守政聲大

著母喪服闋復知南雄時梅嶺險峻行者艱阻乃募民

疏鑿通道至今便之致仕卒於家

人物志

黃維字叔經星子人永樂閒由舉人任餘姚知縣政尚

簡易務修學校民有健訟者遣入社學久之化爲善士

以母喪歸民計服闋先詣闕請復知餘姚六載考績民

脫履留之未至京卒

人物志

袁容建昌人

史作壽州人

父洪以軍功授左軍都督容尚永

安公主成祖靖難容帥師援永平下雄縣取漢州攻真

定命還守北平經營調度應機決策繕修備禦屢立大

功永樂元年錫誥券封奉天靖難推誠宣力武臣特進
光祿大夫駙馬都尉廣平侯食祿一千五百石卒贈沂
國公諡忠穆子貞嗣卒無子庶弟瑄初授僉事仍復侯
卒弟琇嗣卒停襲

明史公主傳府志

魏源字文淵建昌人永樂進士除御史辨松江知府黃
子威誣奏減浙東瀕海漁課巡按陝西西安大疫奏言
諸府倉粟積一千九十餘萬石足支十年今民疫妨農
請輸鈔代兩稅之半從之洪熙初出爲浙江副使宣德
三年召署刑部右侍郎河南旱荒民多轉徙帝以源廉
正命爲左布政使發倉廩免逋賦雜役雨亦旋降歲大
豐召還授刑部左侍郎命采木四川兼飭邊務英宗卽
位進尚書正統二年命整飭大同宣府諸邊便宜行事

源遣都督僉事李謙守獨石楊洪副之劾指揮杜衡等
戍廣西諸將肅然按行諸險要令將吏分守設安遠衛
增修開平龍門城自獨石抵宣府增置墩堠免屯軍租
一年儲火器爲邊備諸依權貴避役者悉括歸伍還朝
坐決不當與侍郎何文淵等俱下獄復以遼王事繫詔
獄累月釋還職源在刑部久議獄多平恕八年致仕尋

卒

明史

余鼎字正安復升子永樂進士是科詔選天下文學之
士二十八人以應列宿鼎與焉尋授翰林修撰博學能
文與修聖學心法及高廟實錄晉侍講尋上章乞歸鑿
釣臺以自娛所著有南坡文集

人物志

盧翰字邦臣星子人永樂進士授翰林院庶吉士與二

十八宿之選修永樂大典歷代名臣奏議改吏部主事

林志

張鑑字惟明建昌人永樂進士巡按陝西考察文武劾

陽武

舊志誤
舞陽

侯薛祿應城伯孫昌不法事糾冢卿郭璉

後出爲汝甯知府

人物志
析建昌

白志舊案正德十一年始
置安義人物志以鑑爲安義

人者說又鑑同邑同榜有胡新者
由御史歷官按察使見明一統志

黃珏字重美異之子少端重勵行永樂舉人爲星子訓

導歷安東東河教諭典陝右文衡才名爲世所重

人物志

邵嵩字維嶽都昌人永樂進士任監察御史巡按遼東

風采著聞復按廣東以言事逆旨謫官因疾遂不仕自

號湖山居士有湖山集

人物志

柳芳都昌人永樂進士歷官刑部郎中讞獄平恕升湖

廣參政尋調山西所至有政蹟時論歸之

明一統志

呂漢字朝宗星子人娶陳氏生一子早喪漢年二十餘親族勸之再娶漢曰婦失夫理不容改節夫失婦義猶是也況有子足繼宗嗣何再娶爲年八十五而卒

林志

江福都昌人以祖壽征陳友諒有功授鎮武衛鎮撫洪熙元年福襲祖職立功升本衛指揮同知景泰元年生禽叛臣喜甯升後軍都督

林志

劉衢星子人榮祖之子由鄉舉任長甯教諭性仁孝宣德間舉家罹疾母將危求以身代一夕焚香籲天割股烹粥啖之母病瘥鄉人以劉孝子名之

明一統志

梁崑星子人嘗罹疫癘舉家逃避弟病危眾諭使棄之出避崑曰如崑去弟誰視湯藥竟不去人以友愛稱之

後由監生授建平訓導升光山教諭卒於家

明一統志

葉瑾星子人少孤姿性英敏既長以詩領宣德乙卯鄉薦歷儒官三十年所至訓迪有方人才輩出致仕卒於

家

明一統志

朱讓字克遜星子人景泰閒由舉人授御史遇事敢言不畏權勢出按廣東肅振百僚尋升大理知府多惠政以疾告歸卒於家

明一統志

黃暉字有融建昌人景泰進士授工科給事累陳章疏奉使滿刺加

舊志脫加字

國授一品服色官至廣西僉事有

政聲

府志

余濂字宗周

林志誤因

都昌人宏治進士任監察御史立朝

上章有陳愚錄巡按遼東有安邊集以勘張天祥獄謫

雲南布政司照磨遷武進知縣預勦蘇松海寇有功升
蘇州府同知以母憂歸武宗時終雲南副使

明史王獻臣傳林

邵有道都昌人宏治進士厯官汀州知府築郡境以內
橋四十餘座復濠百餘丈上杭永定二縣每以糧米致
爭有道定之吏民俱服爭以永息在任四年五見甘露

郡稱大治擢雲南副使

福建通志

殷廷舉星子人由鄉舉任監利縣值大水至城野俱沒
廷舉遂大修諸隄計地任功費不繁而役不困明年夏
鼃洲隄將陷豫與民約曰倘不幸隄陷或死或徙者將
不可勝數民素樂爲用卽日城野負畚鍤者萬餘人不
期而集須臾隄完復爲月隄以障之性勤儉常衣一布

袍夜分乃寐會澤中有盜千人廷舉知難於勦扁舟入

其壘諭以禍福輒散去

湖廣通志

但啟元星子人以舉人知香山縣有惠政時鹽地日削

竈丁逃亡者多額仍舊版至有一人而兼數丁者即徙

之它業仍責其課啟元憫之會清審鹽場丁口數為力

請得除竈民慶更生焉

廣東通志

曹文英都昌人事父孝子珩繼父志母疾額天請代嘗

母糞治療得痊父卒廬墓三年珩子必和事母葉氏曲

盡孝道父母卒俱廬墓三年敕建世孝坊

安志 舊案文英同

邑詹介建昌杜春一姜來聘星子陶誌陳家儀安義余大啟周雲騰俱以孝義見安志附錄姓名於此

左啟星子人父母卒刻像無木憩道旁大樹下望之垂

泣葉遂落主人訝問伐木與之歸刻定省如生有司以

聞詔旌其門

安志

黃祺字惟德建昌人正德進士任吏部考功清查積滯
厯升貴州按察使雲南布政從都御史毛伯溫征勦安
南乞歸淡退自守

人物志

徐相字文卿都昌人正德鄉薦任連州清苦自甘苗寇
偪連征勦有功升僉事不就而歸連民舉祀名宦

府志

陶尚德字祖容星子人爲諸生時值宸濠之變守令學
博棄城走尚德倡於眾曰先聖宮殿邊豆樂器在焉甯
死守濠去澤宮無恙登嘉靖進士授御史有防邊漕糧
茶稅諸疏累擢工部侍郎董築外羅城晉左都御史協
吏部考察轉刑部尚書加太子太保一品俸賜玉歸田
著賓廬藁鷗波亭集穆宗御極特賜存問卒賜祭葬

人物

志

周志偉安義人嘉靖進士任工部主事清理蘆課改釐夙弊升台州知府治河賑荒民建生祠歷四川兵備副使夷苗歸化塑像祀之所著有陽山集及台州倡和集

人物志

周希貴字子良安義人賦性剛方禪躬耿直初任石首教諭升井陘令尋升麻哈知州抑制土官夷苗輸服管大理銀廠稅革除萬金厯官二十餘載清介不易

府志

吳尚禮星子人嘉靖二年由監生除授歸善主簿蠻寇

入境尚禮奮不顧身督兵勦賊遂遇害

人物志

陶一貫字孔啟星子人由選貢除福建布政司理問退休因寓白下聞倭賊潛入蘇松掠淮揚偪留都自赴軍

門請兵討之駐營吳江軍威大振後遇賊於浙江德清縣力戰而沒都御史譚綸偕兩院奏聞贈奉議大夫立

廟崇祀

人物志

熊儼字敬吾星子人爲諸生時卽棄舉子業潛心性學授徒白鹿洞初與布衣章潢語未合復聞羅汝芳得王學旨要徒步往南昌與語移時若合符契所著有易經翼旨熊子庸言羅氏一貫編匡樵野詠等書

人物志

余應桂字二磯都昌人萬厯進士厯知武康龍巖海澄三縣崇禎四年徵授御史劾戶部尚書畢自嚴朋比殿試讀卷取陳于泰爲第一于泰者首輔周延儒姻也復劾延儒納孫元化參貂受楊鶴重賂帝方眷延儒責應桂未幾賊陷登州元化被執應桂再疏劾延儒帝怒貶

三秩引疾歸七年還朝出按湖廣捐贖銀十餘萬募壯
士繕城治器帝嘉之期滿命再巡一年盧象昇撫鄖陽
紂軍需應桂貽以贖銀萬五千象昇改撫湖廣應桂頌
其忠謀請畀重權令埽蕩羣賊已而象昇赴汝維賊老
回回等走德安黃州應桂急檄大將秦翼明拒擊而奏
報屬城失事具以實聞期滿當代復留巡撫王夢尹罷
卽擢應桂右僉都御史代夢尹其冬總理熊文燦至廣
布招降之令劉國能先降明年春張獻忠亦降馬進忠
西走馬光玉賀一龍李萬慶順義王九條龍等眾十餘
萬盡萃於麻城黃安應桂分兵扼要害會光玉一龍乞
降應桂遣使往諭而遣將擊順義王等於黃福店賊遂
走黃安會文燦至麻城應桂請協擊不從賊復東走江

北爲左良玉所遏折而走廣濟斬水文燦檄諸道兵合
擊賊於茶山賊於應桂所分地逸出文燦遂劾其後期
誤軍兵部尚書楊嗣昌恨應桂曾劾其父奏逮之應桂
陳撫勦始末白己無罪而力詆文燦不納逮至下獄初
應桂慮獻忠反復貽書文燦言獻忠惡已有端可先未
發圖之其書爲獻忠邏者所得獻忠牒鄖陽巡撫戴東
旻言撫軍欲殺我語甚悖東旻聞之文燦文燦遂再糾
應桂以私書貽誤封疆帝怒下法司并按應桂疏辨且
言獻忠布賊孔道邀勅公移總理噤不敢問奈何反據
賊口誣臣帝亦不納應桂竟遣戍已而獻忠反文燦伏
誅東旻亦瘐死獄中廷臣交章薦應桂起兵部右侍郎
督師孫傳庭戰歿命應桂兼右僉都御史往代之應桂

以無兵無餉入見帝而泣帝但遣京軍千人護行給御用銀萬兩銀花四百銀牌二百爲軍前賞功之用而已應桂將至山西賊已入其境邊巡不得前帝責以逗留奪職命新擢陝西巡撫李化熙代之化熙亦不能進也未幾京師陷應桂遂家居不出久之死於難

國朝賜諡忠節

明史 白志 勝 朝殉節諸臣錄

徐大相字覺斯安義人萬厯進士授東昌推官稍遷國子博士百僚將早朝中官盧受傳免眾趨出受從後姍侮大相歸草二疏一論遼左事一論受奸邪時接疏者卽受也見遼事疏曰此小臣亦敢言事及帝閱第二疏顧受曰此卽論汝罪者受錯愕叩頭流血請罪曰奴當死疏乃留中明年遷兵部主事調稽勳移考功進驗封

員外郎進士薛邦瑞爲其祖蕙請諡大相與尚書張問
達議如其請熹宗方惡卹典宄濫錫大相三秩出之外
大學士葉向高都御史趙南星等連疏救乃改錫二秩
大相方候命羣奄黨受者數十輩持挺譟於門比搜大
相橐止俸金七十兩乃闕然散崇禎元年起故官遷郎
中歷考功文選奏陳遵明旨疏淹滯破請託肅官評正
選規重掌篆崇禮讓勵氣節抑僥倖覈吏弊十事帝卽
命飭行故尚書孫丕揚等二十六人爲魏忠賢削奪大
相請復其官不許旋以起廢忤旨貶秩父憂歸卒於家

明史

熊德揚字日乾建昌人萬歷進士授高明知縣調德清
竟任不名一錢選刑科給事中累劾中官奉使祭北鎮

論遼東經撫忤柄臣調外葉向高鄒元標等皆請留臺不聽崇禎己巳起兵科給事中庚午副黃道周典試浙

江國變後屢薦不起隱居雲門卒年八十

縣志

徐孔徒字服子都昌人萬厯舉人授四川邛州牧在任七載賢聲特著乙酉張獻忠陷城抗節死焉

國朝賜諡節愍

人物志勝朝殉節諸臣錄

余經元字冠卿都昌人貢生居親喪毀瘠過禮兄經魁困於賦經元鬻己產以佐兄嘗登白鹿講堂爲致知格物之學有義利辨性教志氣諸解天啟開郡司理李仲達忤璫罹獄經元質田得若干緡爲諸生倡義及卒黃道周表其墓

府志

但宗皋字陶邨星子人天啟鄉舉任開化令時議採雲

霧山茶具七不可以閒事遂止歸休杜門著述有廬山

詩文二紀湖南講書太極圖說驢背語

縣志

熊士愷字仲高德陽次子事親能養志天啟鄉薦人稱
眞孝廉有舟子失金誣其僕不辨輒倍數償之會同舍
有爭席者質於士愷立推己席委之同舍生慙更相讓
其克己類如此

府志

淦君鼎字四極建昌人崇禎歲貢選贛州府學司訓丙
戌吉州陷君鼎與諸生守贛謂其長子宏斌曰我與城
亡邱隴可念勿以吾爲憂城陷不屈死先是次子宏祐
傷箭不起是日三子宏祉於廨中以晉賊被殺妻熊氏
宏祐婦熊宏祉婦李孫關生秀貞婢呂氏端香輩並赴
井死惟宏斌脫歸

國朝賜君鼎諡烈愍人物志勝朝殉節諸臣錄

熊維典字約生建昌人崇禎閒兵科給事中鼎革後不

仕巡撫蔡士英按察使李長春延主鹿洞書院白鹿洞志

陳其誠字獻赤安義人崇禎閒選貢官行唐令剛介不

避勲貴吏民畏愛致仕歸林課農訓子有司延為鄉飲

大賓府志

國朝

徐碭字三連安義人順治進士一作舉人官湖廣益陽知縣

奉檄招撫吳三桂被害卹贈僉事予祭葬廕一子入監

乾隆閒入祀京師昭忠祠府志

宋之盛字未有星子人少孤事兩兄如父明崇禎己卯

以春秋薦會試不第歸鄉里不入城市以講學為己任

其學以明道爲宗識仁爲要與盱江謝文海最契晚讀

胡敬齋居業錄持敬益密同邑查轍字小蘇亦棄諸生

山居不出年九十而終白志一謹案星子縣志之盛於

與同里查轍吳一聖余晬查世球夏偉門人周祥發講

學髻山號髻山七隱世球與余應桂之難吳一聖余晬

有傳夏偉周祥發無考余晬字卓人星子人明亡居髻山隱居教授建宗祠萃

子弟讀書習禮其閒族有爭言咸取平焉府志

吳一聖字敬躋星子人明崇禎鄉舉隱居髻山四十年

知府廖文英聘爲白鹿院長府志

于特一作干字達士星子人有文行聞撫張伯行聞其賢

聘主鰲峯書院不就以子建邦貴封文林郎府志

王廷憲字斌爲安義人博學俊爽明崇禎鄉舉康熙初

宰歙縣聞父喪瀝血辭職以新例奪情哀毀骨立累章

乞終制乃得請抵家撫柩慟哭吐血數斗逾年遂卒

府志

李夢蘭建昌人負勇略耿精忠叛夢蘭招集義勇保障

地方以功授同知銜尋知雲南楚雄縣兵亂後累歲通

賦甚多民無以供力請大吏疏題豁免以孫鳳翥貴贈

通議大夫

謝志

邵良傑字萬子都昌人康熙鄉舉白鹿書院院長條教

一本朱子躬行實踐學者多所矜式卒從祀白鹿洞邵

康節祠九江道和其衷爲之記

府志

李鳳翥字紫廷建昌人康熙進士改庶吉士散館授編

修分修大清一統志告成蒙

御書石硯之賜充會試同考官督學順天安徽典浙江鄉試所

甄賞多名士洊擢通政司參議賑饑畿輔歸陳民閒疾
苦奏對剴切累遷至工部侍郎乾隆閒致政歸歷仕三
朝清風亮節著於朝右

縣志

于一作

建邦字淑掌特予康熙進士官舞陽知縣時值

大澇甫報災先發倉以濟民食興復舞泉書院置田聚
書教育並行鄰邑有蝗不入舞陽境上官異之以憂歸

民懷思不忘

府志
縣志

徐京陞大相孫貢生湖廣竹谿知縣兵事初定苗民襍
處京陞至力爲振興相率馴服民不解爲水車遇旱輒
困京陞下車式於民自是竹谿民知引水之法旋乞養

歸府

志

李鳳彩字圖南建昌人廩生康熙閒武舉從軍西藏積

功至平涼鎮總兵著西藏行軍紀略二卷嘗督陝甘全省軍儲喜接見儒者上下其議論幕中號得人尤善書人爭乞之所至稱鐵船將軍鐵船其別字也

府志

周倬建昌人諸生族有以貧鬻妻者倬力助之得完聚火及倬居父柩在堂倬哀號籲救反風獲免人以爲孝

感

崇祀錄

王廷實安義人諸生性孝父喪明廷實舐之而愈執親之喪哀慕三年間賊犯境聯鄉勇擣賊巢邑賴以安卒

祀鄉賢

崇祀錄
衡星子詹學閔俱以孝義稱附錄於此

謝志舊案安志所載安義王家

許廷鼐字薌友都昌人歲貢生官樂安訓導康熙甲寅

耿精忠叛逆黨犯樂安城破脅之降不屈自縊死

府志

胡南藩字楚雄星子人雍正進士山西臨晉知縣調四

川彭縣遷廣西養利州擢潯州府嘗修潯志興利除弊

靡所不舉

府志

宋士宗字司秩之盛孫雍正中順天鄉舉官南豐教諭

光祿寺卿那爾泰薦舉博學鴻詞部駁不得與試學守

程朱著述繁夥

府志

熊葵向字立堂安義人拔貢生四川知縣初權禾甯事

地當孔道差役繁重故事以鋪戶派夫葵向至盡除其

累民頌之再權崇甯富順以慈惠稱

府志

何振宗字勉齋建昌人拔貢生授官教諭改直隸州判

既復選石城縣教諭平生好學不倦多所著述

府志

詹易字經源安義人乾隆進士官山東聊城知縣調昌

邑值海潮泛濫力請賑饑免稅皆如議行擢廣東嘉應

知州鋤奸息訟薦舉卓異進福建建甯知府營弁獲汀州匪傳元禧搜其所藏名籍事連浦城人甚眾易訊元禧得挾私傾陷狀悉白其冤浦城人尸祝之乞歸卒子

鶴齡錫齡孫堅曾孫景鐘皆成進士

府志縣志

黃鶴齡字櫟田都昌人乾隆鄉舉山西蒲縣知縣政治嚴肅捕土豪置諸法量移河津潛水築隄均徭役清銅鹽舊弊建立薛文清書院先是邑井味苦至是皆甘人以爲政感調臨汾政治如在河津時擢太原同知權解州知州太原知府冀甯道所至皆有聲

府志

于從濂字希周星子人乾隆進士福建尤溪知縣俗多溺女又惑形家言焚親骸納諸甕中覲善地私葬之從濂剴切勸諭陋習漸革移知閩縣訪主訟者姓名列榜

索之豪猾屏迹擢臺灣淡水同知生番焚殺爲暴親入
山宣播威德諸番聽命遷甘肅鞏昌知府值歲旱移粟
賑之進甯夏道所至懲邪說燬淫祠民服其教孫廷熒

進士官戶部主事

府志
縣志

盧幣字西麓建昌人乾隆鄉舉會試入明通榜官河南
鄆陵知縣興學校革科派政尚慈惠嘗爲鄉闈同考官
得士范學頤遂充舉首以母老乞養歸母卒讐年七十

有一不勝哀亦卒

府志
縣志

李芳杞字足堂建昌人乾隆鄉舉官安徽歙縣知縣調
阜陽歷權英山桐城諸縣徽州府通判安慶府同知皆

稱循吏

府志

郭祚熾字筠池建昌人乾隆進士官通政司經歷京察

擢主事乞養歸前後主豫章鹿洞書院士林仰之若山
斗嘉慶二十一年重宴鹿鳴道光元年重宴瓊林一時

稱盛事弟祚炳進士福建知縣府志

江炯字鑑亭建昌人乾隆鄉舉大挑知縣歷官甘肅高

臺鎮番以親老乞改教職累爲瑞昌弋陽泰和教諭遷

撫州教授襟懷沈毅爲學務求根柢殫心著述府志

項家達字仲兼星子人父鳴鳳副榜貢生好恤貧寡獎

進後學卒祀鄉賢家達乾隆進士改庶吉士散館授編

修典試河南督學山西累充鄉會試同考官巡漕天津

高宗南巡召見行在和

御製禽獲臺灣賊莊大田諸詩再巡南漕九上疏言漕運利弊

下部議行浔升太常寺少卿以漕船私攜木植事發追

理失察落職旋起刑部主事擢郎中典四川鄉試以憂

歸不復出

府志

顧長紱字修浦建昌人乾隆進士官戶部主事累遷員外郎出爲陝西鹽法道轉督糧道巡撫畢沅偉其才議輒施行甘肅回作亂長紱籌軍儲有功進山西按察使移貴州

陞見以祖母及母年老奉

旨調浙江嘗親鞫海盜得其渠魁治如律釋株累數十百人進

浙江布政使以失察罷歸孫塋拔貢生官刑部主事

府志

縣志

查復經字九達星子人乾隆進士選蠡縣知縣有政聲以忤上官改臨江府教授子振旗舉人講求濂洛之學

敦儒業能世其家

府志
縣志

楊繼熊字兼山安義人乾隆進士官江蘇知縣歷權江甯督糧同知北捕通判攝贛榆事皆有政聲補昭文肅清吏治廉介自守民爭繼奪產啗以萬金斥去之卒斷如律既而訟大府仍如繼熊讞無以易也其廉明類如此

府志

楊秀享字晏集安義人拔貢生官山西代州州判權襄陵縣事歲饑請賑文書久不下秀享乃出積俸以濟貧戶四境德之移武鄉善決疑獄再權繁峙乞養歸

府志

吳崇紳字賁貞建昌人嘉慶進士能爲古文雄健近昌

黎

府志

彭斗山字星垣安義人道光進士官山東知縣初補鄒

平爲政不事苛察而人亦不能欺旣而調壽張壽張苦
河患斗山與河工官協力以治功成漕不愆期屢調南
山滕縣滕民好訟斗山至甫半歲案無留牘追捕巨盜
劉二安子至浙江獲之旋乞養歸起權昌邑再補滕縣
以疾去官尋卒

府志

邵廷選字意山都昌人十歲失怙事大父寡母孝養如
成人旣成諸生援例授訓導咸豐初署新喻教諭回籍
練兵四年賊竄都昌廷選負重傷得脫赴省乞師竝繪
都昌湖口形勢上之大府請於石鐘山梅家洲築礮臺
而駐重兵於張家嶺以固江西門戶嗣後賊據險卒如
其言五年署安遠縣訓導偕知縣張仁法辦理團練廷
選方赴西鄉而土盜李元古陷縣城乃與仁法乞援於

鄰邑旬日克之改署教諭八年石達開圍都昌廷選偕文武吏登陴固守賊穴城敗之駕呂公車乘城又敗之賊築長圍爲久困計援至得解十年賊竄北鄉偕知縣陳喬榮擊走之其秋廣東賊入信豐安遠危甚徵鄉團無一至者廷選商之喬榮親赴長甯募兵道出東鄉命練總歐陽雲慶等率所部先入守比自長甯成軍而賊已圍城廷選至官鋪猝與賊遇縱擊敗之擒執旗賊目逐北十餘里移營沙含墟戰又捷復以孤軍邀賊於阨塹大捷進次絲毛坪逼賊而營日凡數戰賊雖敗迄不退九月援賊自後路至軍驚潰廷選馬蹶遂遇害團丁死者三百七十餘人是役也賊凡十數萬廷選以千餘人苦鬪而月斬馘數千賊以受創東走安遠圍卒解

詔贈國子監助教予世職入祀昭忠祠

縣志忠義錄

江西通志卷一百六十四